

迷

朱

質

疑

述朱質疑卷之八

當塗夏忻心伯甫學

陸文安公張宣公論

陸文安公少朱子九歲。張宣公少朱子三歲。皆以聰明絕世之資。聞道甚早。又得朱子爲之友。而成就各不同者。何哉。宣公受學於胡五峯。五峯爲伊川三傳弟子。知言一書。五峯所講授。宣公所奉爲準繩者也。朱子於性無善惡。心無已發。仁以用言。心以用盡。不事涵養。先務知識。諸論力辨其非。而宣公一一翻然從之。呂成公稱其事師。未嘗如世俗學一先生之言。暖暖姝姝。

不復更求其進學之力者。可謂真知宣公者矣。觀朱子與宣公諸書。一義之合違。一言之同異。必反覆辨證。不遺餘力。卒乃同歸而一致。然則宣公之爲學。其用心也虛。其親賢也篤。其集益也廣。其從善也勇。乾純諸老之中。學足以肩隨建安。而傳之後世無弊者。不得不於宣公首屈一指也。若夫陸文安公之學。一門兄弟。自相師友。非有先正名師之指授也。世無朱子。則已。卽有之。而或道里遼遠。華彝隔絕。則亦已矣。乃相望數百里之間。而又有呂成公爲之介紹。一會講於鵝湖。再會講於白鹿。朱子之德盛禮恭。情深心苦。欲挽注腳六經之習。以爲干城吾道之

功所以誘掖而接引者亦不可謂不至矣。當復齋先生之未沒也。輒雖歧而陷之未深。迹雖偏而轉之尙易。迨復齋先生之既沒也。王荊公之祠記曹立之之墓表。無往不開其爭憤之端。至於無極太極之辨。各尊所聞各行所知。而文安公之學遂於鄒魯伊洛以外別樹一幟矣。明高忠憲公以無我有我論朱與陸曰。學爲聖賢必自無我入。無我而後能虛。虛而後能知。過知過而後能日新。日新而後能光大。有我者反是。然則文安公之學所由與宣公大異歟。

陸文達公學術與文安公不同攷。

江西二陸並稱。後世因鵝湖之會。文達文安兄弟。與朱子論學不合。遂統謂之曰朱陸。不復別文達於文安之外。不知文達之學。晚年有就正之功。文安之學。終身無轉移之境也。比而攷之。竊取君子之表微焉。

宋史陸九齡字子壽。稍長。補郡學弟子員。時秦檜當國。無道程氏學者。九齡獨尊其說。

陸九淵字子靜。總角聞人誦伊川語。自覺若傷我者。又曰。伊川之言。奚爲與孔子孟子之言不類。

所按二公少時。一則特尊程學。一則不信伊川。其性質已判。

若天淵矣。

象山年譜復齋

子壽號復齋

因讀論語命先生近前問曰看有子一

章何如先生曰此有子之言非夫子之言復齋曰孔門除卻曾子便到有子未可輕議先生曰夫子之言簡易有子之言支離復齋嘗於窗下讀程易至艮其背四句反復誦讀不已先生偶過其前復齋問曰收看程正叔此段何如先生曰終是不直徹明白艮其背不獲其身無我行其庭不見其人無物

所按文安譏有子爲支離譏正叔爲不直徹明白文達則謂有子之賢未可輕議且於正叔之傳反復誦讀其學術亦甚

不同矣。

呂東萊集與朱元晦書云。撫州士人陸九齡子壽。篤實孝友。兄弟皆有立。舊所學稍偏。近過此。相聚累日。亦甚有問道四方之意。

析按此乾道九年癸巳書也。呂東萊壬辰丁外艱。癸巳。陸子壽來訪。見東萊年譜書中云。甚有問道四方之意。可見文達不滿意於家庭之學矣。後伯恭邀集鵝湖。卽因文達問道四方之意。而爲是會耳。

朱子年譜純熙二年乙未。呂伯恭來自東陽。過先生寒泉精舍。

東萊歸，送之至信州鵝湖寺。江西陸九齡子壽，弟九淵子靜，及清江劉清之子澄，皆來會。

嚴松年錄象山語云：呂伯恭爲鵝湖之會，先兄復齋謂某曰：伯恭約元晦爲此集，正爲學術異同。我兄弟先自不同，何以望鵝湖之同？先兄遂與某議論致辨，又令某自說。至晚罷，先兄云：子靜之說是，次早某請先兄說。先兄云：某無說，夜來思之。子靜之說極是，有得一詩云：孩提知愛長知欽，古聖相傳只此心。大抵有基方築室，未聞無址忽成岑。畱情傳注翻綦塞，著意精微轉陸沈。珍重友朋相切琢，須知至樂在於今。某云：詩甚佳，但第二



勗微有未安。先兄云說得恁地。又道未安。更要如何。某云不妨。一路起行。某沿途卻和此詩。及至鵝湖。伯恭首問先兄別後新功。先兄舉詩才四句。元晦顧伯恭曰。子壽早已上子靜船了。舉詩罷。遂致辨於先兄。某云。途中和得家兄此詩云。墟墓生哀宗廟歎。斯人千古不磨心。涓流滴到滄溟水。拳石崇成泰華岑。易簡功夫終久大。支離事業竟浮沈。舉詩至此。元晦失色。至欲知自下升高處。真偽先須辨。只今元晦大不懌。於是各休息。異日二公商量數十折議論來。莫不悉破其說。繼日凡致辨。其說隨屈。伯恭甚有虚心相聽之意。竟爲元晦所尼。

王氏懋竑云。按象山語錄。子壽與子靜學問。原有不同。及將會鵝湖。子靜再三辨論。而子壽乃以子靜之言爲是。遂作孩提知愛一詩。子靜以爲然。故鵝湖之會。子壽舉詩四句。朱子曰。子壽早已上子靜船了。其時二陸與朱子辨論皆不合。所按春秋重主盟。此會雖陸氏兄弟同來。實文安主之。文達與文安之學。平日本不同。是以文安謂文達曰。我兄弟先自不同。何以望鵝湖之同。則其家庭之旨趣可知矣。未會之前。文安先與文達講論者。蓋必求其同。欲文達之從已也。文達知文安之意。故令其先說。又知文安不可屈。故但云子靜之

說是也。次日文安仍恐其不合，故再問之。文達益知其不可。屈故云子靜之說極是也。孩提知愛一詩，卽就文安之所說而咏之，以明已之必不異於文安，而文安猶以第二句爲未安者，推其意以爲孩提知愛，旣長知欽，遂人之心皆有之，不必古聖人之相傳。故和詩易之云：斯人千古不磨心。隱以規文達之不足也。後世良知之學，卽從鵝湖詩首二句悟入。陸氏兄弟本東萊之友，與朱子不相識。東萊畱止寒泉數十日，必爲朱子言二陸梗槩，并文達與文安不同之處。故朱子一聞其詩，深訝子壽將登於岸之學，竟爲子靜一葦航之也。不

然朱子何以知之哉

象山年譜先生更欲與元晦辨以爲堯舜之前何書可讀復齋止之

所按文達之止文安有深意存焉非徒爲一時辨難之不已也

呂東萊集荅邢邦用書云祖謙與朱元晦同至鵝湖二陸與子澄諸兄皆集前書所論甚當近已嘗爲子靜詳細言之講貫誦習乃百代爲學通法學者緣此支離泛濫自是人病非是法病見此而欲盡廢之正是因噎廢食

所按二陸之詩同途共轍。伯恭別後。獨爲文安詳細言之。不及文達者。正以鵝湖之議。文達爲文安所挾。而主之者獨文安也。

象山年譜。純熙四年春正月丁繼母太孺人鄧氏憂。

朱子文集荅葉味道書云。所喻旣祔之後。主不當復於寢。向見陸子靜居母喪時。力主其說。其兄子壽疑之。皆以書來問。因以儀禮注中旣祔復主之說告之。而子靜固以爲不然。直欲於卒哭而祔之後。徹其几筵。子壽疑而復問。因又告之以爲如此。則亦無復問其禮之何如。只此卒哭之後。便徹几筵。便非孝子之

心已失禮之大本矣。子靜終不謂然。而子壽遂服。以書來謝。至有負荆請罪之語。

所按二公居喪之不同。講禮之不同。又如此。朱子文集中有與陸子壽論既祔復至二書。

朱子年譜純熙六年己亥春正月。復請祠不報。候命於鉛山。陸子壽來訪。

余大雅錄朱子語云。陸子壽自撫來信。訪先生於鉛山觀音寺。子壽每譚事。必以論語爲證。如曰聖人教人。居處恭。執事敬。又曰子所雅言。詩書執禮。皆雅言也。弟子入則孝。出則弟。謹而信。

汎愛衆而親仁。此等教人皆實處行。何嘗高也。先生曰。某舊時持論亦好高。近來漸漸移近下。漸漸著實也。如孟子卻是將他已到底教人。如言存心養性。知性知天。有其說矣。是他自知得。餘人未到。他田地。如何知得他滋味。卒欲行之。亦未有入頭處。若論語。卻是教人存心養性。知性知天。實涵養處。便見得。便行得也。

子壽看先生解莫顯乎微云。幾微細事也。因歎美其說之善。曰。前後說者。連莫見乎隱一滾說了。更不見切體處。令如此分別。卻是使人有檢點處。

王氏懋竑曰。鵝湖會後。子壽益頗自悔其前說之誤。故鉛山來訪時。其論與朱子多合。亦不與子靜俱。而卒從朱子之說。所按鉛山之訪。在免喪之後。自踐其負荆請罪之言。而因以其學就質於朱子也。

東萊集與元晦書云。

此書在庚子張南軒既卒之後

子壽前日經過。畱此二十

餘日。幡然以鵝湖所見爲非。甚欲着實看書講論。心平氣下。相識中甚難得也。

所按文達去年詣鉛山。今年過東陽。卽此兩年之間。僕僕於朱呂之門。非幡然改悔。求道真切。其何能若是乎。



朱子文集答張敬夫書云

即答敬夫前書

子壽兄弟得書子靜約秋涼

來遊廬阜但恐此時已換卻主人耳

朱子應詔上封事孝宗大怒曰是以我爲亡也趙雄

力爲救解乃已

渠兄弟今日豈易得但子靜似猶有些舊來意思聞其

門人說子壽言其雖已轉步而尙未移身然其勢久之亦必自轉回思鵝湖講論時是甚氣勢令何止十去八九耶

所按此書專說文安不說文達蓋文達去年會鉛山已改從

朱子之教矣文安之雖已轉步而尙未移身出自文達之口

則文達勸戒之力居多惜乎是年九月文達遂卒而文安仍

自守其學以終身也

象山年譜純熙七年庚子秋九月二十九日季兄復齋先生卒。朱子文集祭陸子壽教授文云。學匪私說。惟道是求。苟誠心而擇善。雖異序以同流。如我與兄。少不並遊。蓋一生而再見。遂傾倒以綢繆念。昔鵝湖之下。實云識面之初。兄命駕而鼎來。載季氏而與俱。出新篇以示我。意懇惻而無餘。厭世學之支離。新易簡之規模。顧予聞之淺陋。中獨疑而未安。始聽瑩於胸。次次紛繳於談端。徐度兄之不可以辨屈。又知兄必將返而深觀。遂逡巡而旋返。悵猶豫而盤旋。別未幾時。兄以書來。審前說之未定。曰子言之可懷。逮予辭官而未獲。停驂道左之僧齋。兄乃枉車。

而來教相與極論而無猜。自是以還。道合志同。何風流而雲楸。乃一西而一東。蓋曠歲而索居。僅尺書之兩通。期杖履之有顧。或慰滿乎予衷。屬者乃聞兄病在牀。亟函書而問訊。并裹藥而攜將。曾往使之未返。何來音之不祥。驚失聲而隕涕。沾子袂以淋浪。嗚呼哀哉。今茲之歲。非龍非蛇。何獨賢人之不淑。屢興吾黨之深嗟。惟兄德之尤粹。儼中正而無邪。至其降心以從善。又豈有一豪驕吝之私耶。

陳氏建曰。陸子壽之卒。朱子爲文以祭之。象山則無。

所按此文敘次文達先後學術。取爲明哲。然則朱子早異晚。

同之說移而施之文達誰得議其非者而道一定論諸編反屬之文安何也文中敘鵝湖別後一書有未定之語惜乎復齋之集久佚不復能見其詞矣

呂東萊文集與朱元晦書云陸子壽不起可痛篤學力行深知舊習之非求益不已乃止於此於後學極有關係也痛痛

朱子文集荅呂東萊書云子壽云亡深可痛惜吾道不振此天也奈何奈何

所按文達之卒二先生痛惜之如此可見文達晚年之學實不異於朱呂矣

陸文安公踐履篤實論

陸文安公之學，真有名實不相應之弊。至其心術品行，則裏裏洞徹，踐履篤實，大賢也。觀其一家兄弟，自相師友，雖睦之風，式乎鄉鄰。其內行純備如此。幼而穎悟，九歲能文。二十四歲猶未肯赴舉。伯兄復齋力勉再三，始以周禮鄉薦。丁宣教公憂，未赴。又十年始再應鄉舉。南宮旣捷以後，兩遷主簿，俱以母兄之喪回翔十餘載未上。其安貧樂道，恬於仕進如此。薦除國正，啓諭諸生如家居教授，感發良多。其推誠誨士，忠告不參如此。遷教局四年，親友勸以久次宜還。先生曰：「往時面對粗陳大義，明三

不以爲非。然條貫靡覓。統紀未終。思欲再望清光。少自竭盡。以致臣子之誼。其眷戀朝廷。矢懷忠藎。如此。荆門之政。推心豁然。同官稟事。皆得展其所懷。太守所判。僚屬皆得卻回。待同官如朋友。教庶民如子弟。朞月政化大行。周益公謂之躬行之效。其施設惻怛。誠能動物。如此。白鹿洞義利之說。敷陳剴切。聞者流涕。夷考先生平生之行。允蹈無愧。其言行相顧。君子慥慥如此。是以史少師薦牘。稱其沈粹之行。輩行所推。呂成公與陳同甫書。稱其篤實純直。未易多得。朱子與學者書。謂南渡以來。八字着脚。理會着實工夫者。惟某與子靜一人。其推許於諸賢。可謂

至矣。惜其學太信心。傳之不勝其弊。若夫貶頑起懦。足以振斯世衰頹之習。而感發學者廉恥之心。則文安公非誠百世之師哉。

陸文安公推服朱子政績說

金谿與建安之學判然如緇素之分。黑白也。涇渭之別清濁也。岵夷桡谷之殊東西也。太極無極之辨。往復詰難。始終不能相合也。乃獨於朱子。濂東之救荒。極其稱許。社倉之立制。極其法效。南康之人言。極其剖別。江鹵江東之提刑。極其欣冀。初未嘗稍存芥蒂於其中焉。攷象山癸卯與尤延之書云。允晦浙東救

荒之政比者屢得浙中親舊書及道途傳聞頗知梗槩浙人殊  
賴自効一節尤爲適宜其誕慢以僥寵祿者當可阻矣又與陳  
倅書云元晦在浙東大節殊偉効唐與正尤快人心百姓甚惜  
其去其稱許也如此象山在勅局時編朱子社倉法於廣賑恤  
門後倉監復申明其法梭山居士欲仿而置之於青田戊申象  
山與倉監趙汝謙書云社倉事自元晦建請幾年於此矣有司  
不復挂之於牆壁遠方至無知者某在勅局時因編寬恤詔令  
得見此文與同官咨歎者累日遂編入廣賑恤門令乃得執事  
發明之此梭山兄所以樂就下風也其間瑣屑敢不自竭需公



移至績得布稟其效法也如此朱子在南康鋤治豪猾人言頗謂其過嚴象山與尤延之書云元晦在南康已得太嚴之聲使罰當其辜刑故無小遠可以嚴而非之乎某嘗謂不論理之是非事之當否而汎然爲寬嚴之論者乃後世學術議論無根之弊道之不明政之不理由此其故也其剖別也如此朱子自浙東改除江西提刑象山與朱子書云朝廷以旱暵之故復屈長者以使節儻有俯就江西之民一何幸也朱子辭江西提刑詔與江東梁總兩易其任象山又與朱子書曰金陵虎踞江上中原在目朝廷不忘春秋之義固當自此發迹令得大賢暫將使

旨則輅車何啻九鼎中外倚重當增高衡霍斯人瞻仰當爲之  
一新矣其欣冀也如此然則象山與朱子不同者特其學術而  
已彼沈繼祖劾朱子知南康軍妄配數人而後與改正爲浙東  
提舉多費賑恤錢米與其徒而不及百姓狂悖之說有何足責  
卽譏社倉與青苗同法見南軒與朱子書亦出一時如忌之口無庸計  
較獨林黃中立朝風節頗能自異於流輩乃因論易西銘不合  
遂糾朱子致令後之論者與余嘉陳賈胡紘輩同類斥之不亦  
可惜也哉

朱子深戒及門不得無禮於金谿說

昔孔子初見老子。史記載其謂孔子之言甚倨。而孔子不以爲忤。且有猶龍之歎。非老子之賢過於孔子。孔子之聖果不免於老子之所識也。其時老子年高而德尊。孔子適周問禮。方以弟子之禮事之。謙恭卑下。乃少事長之禮。當如是耳。朱子一生拳拳小學。少儀弟子職諸篇。采輯綦備。所以守尼山之家法。而爲後生小子之慮者。可不謂深乎。朱乾純之間。陸文安公以聰明先覺之資。崛起金谿。聚徒講學。與建安壇坫相望。一時英俊後學之士。鮮有及者。是以朱陸之門。互相切磋。劉純安者。學於陸氏。而登朱子之堂者也。來相見時。極口以子靜之學爲大謬。朱

子詰之曰。子靜學術。自當付之公論。公不得遽如此說。又朱子過江鹵。與文安之兄文達對語。而純安不顧而去。獨自默坐。朱子曰。便是某與陸丈言不足聽。亦有數年之長。何得如是。諸葛誠之者。亦遊於兩先生之門者也。朱子詒之書曰。示喻競辨之端。三復惘然。愚意欲深勸同志者。兼取兩家之長。不得輕相詆議。向來講論之際。見諸賢往往有立我自是之意。無復少長之節。禮遜之容。至今常不滿也。嗟乎。觀朱子之所以戒及門者。然後知朱子之於金谿。其心平。其氣下。其禮恭。其詞遜。既以禮自律。復以禮約束及門之士。其所以救金谿之失者。不徒在論說。

之異同也。後世學朱子之學者，矩矱宜尼，誦法小學，躬行實踐之餘，抑然自下，不敢放言高論，以取僭踰之咎。雖未必遽詣學之精微，而大本固已得矣。彼揚眉瞬目如傅子淵者，宜其喪心而失志，而朱子之學，所以能傳之萬世而無弊與。

及門婺源 滕秉乾校字

述朱質疑卷之九

當塗夏忻心伯甫學

呂成公論

朱子稱呂成公少時性褊急。一日讀論語躬自厚而薄責於人。忽覺平時忿懣。渙然冰釋。又云學如伯恭。方能變化氣質。竊以爲成公一生之學。皆得力於論語之兩言。不僅變化其一時之褊急也。成公先世在北宋日。代有名臣。榮公又從二程講學。南渡以來。推中原文獻之傳。必數金華呂氏。成公以宏達偉博之才。無所不通。獨心折於朱張二先生之學。教授嚴州。適值宣公

爲守後又與宣公同朝隔牆而居所以講求之者甚切。乙未之夏訪朱子於建安丙申復會朱子於三衢殷殷就正不辭道遠觀其與朱張二公諸書無非虚心求益切已克治之言其平日責躬之厚可知矣其時臨川陸公子靜永康陳公同甫永嘉陳公君舉葉公正則皆以學名海內自立壇坫莫何相下雖以朱子之賢不能滿臨川永康永嘉之意更何論潭州也成公一一略其所短取其所長明招講席之間陶冶而融鑄之雖未收擴清之功而實無齟齬之憾非其修德之無瑕而與人不求備者能之乎而又非一於優容也觀其與陳永嘉書以所見差異流

弊無窮爲戒。與陳永康書以收斂不可斂之氣。伏槽安統爲訓。至於與子靜言講貫通繹。乃百代爲學通法。學者緣此支離泛濫。自是人病。非是濫病。不可因噎廢食。數語藥石之論。直入膏肓。特其語則從容而不迫耳。朱子以爲有河海之辨而守之若諾。非知成公之深。不能爲是言也。然則朱子之於羣儒。必侃侃明辨者。非與是又不然。朱子傳注六經。繼承斯道。爲往聖明正軌。爲萬世絕異趨。豪釐之差。千里之謬。不直則道不見。此禹之慮民深也。論語厚薄兩言。特爲持身涉世之大法。若夫先聖後聖之所任。學術治術之所關。則有孟子予豈好辨之家法在。夫



言豈一端而已夫各有所當也

張宣公呂成公皆朱子之直友說

自古賢人君子修德講學未有不藉友朋切磋之力而能相與有成者也友以直言規過爲上而諒與多聞次之有朱乾純之間潭州張宣公敬夫先生婺州呂成公東萊先生與朱子鼎立東南共肩斯道二公皆傾心於朱子而自謂其學之不及然其規鍼朱子之言一何切直之不少段借也今觀南軒所與朱子諸書有云辭似甚詐億不信少含宏感悟之意有云子飛說宅上應接費用亦多更深加撙節爲佳有云兄猶有傷急不容耐

處有云願平時以爲納故者作大病醫療有云會聚之間酒酣  
氣張悲歌慷慨皆平時血氣之習未能消磨不可作小病看有  
云元晦學行爲人所尊敬眼前多出已下只是見他人不是覺  
已是處多如此之類不一而足東萊與朱子書有云激揚振厲  
頗乏廣大溫潤氣象不可不省察有云以吾丈英偉明俊之資  
恐當以顏子爲樣轍回擒縱氏昂之用爲持養斂藏之功有云  
來教所謂本不欲如此者意其爲心之正旣而以雕鏤之費用  
度之乏爲義鳥刊  
精義事不得已而止之或者漸近於自恕而浸與初  
心不類乎有云五夫補助不免封倉送郡之類此於時位頗似

優過恐更須於意必兩字上檢點此癸巳書有云但恐習氣勁厲在

事者便謂欲獨爲君子愈扞格不可入耳謂朱子在如此之類

亦不一而足竊謂朱子任道之堅進德之勇好學之深克己之

密豈必盡如二公之所規而二公反復不遺餘力者蓋身心性

命之交望之深慮之切苟有所見無不觀瀾而朱子因以益致

其功遂成名世大賢之德其替劉子澄書何追溯之而有餘愴

也荅子澄云日前爲學緩於返已追思凡百多可悔者猶得敬

夫伯恭時惠規益得以警省二友云亡耳中絕不聞此等語

矣且南軒集四十四卷朱子之所手定凡規朱子之書無一不

存則朱子當日之喜於聞過日益遷善之盛德可以想見矣後

人之學問德行萬分不及朱子之一又無嚴師直友之鍼砭卽有之而或自護其短或隱拒其諫無怪乎德日卑學日退流於小人之歸而不自知也偶讀南軒東萊兩集有見於此遂爲之說以自警并告同志之友皆當以朱子爲法云

### 朱子同時浙學攷

年譜云朱子歸自浙東見其士習馳驚於外每語學者且觀孟子道性善及求放心兩章務收斂凝定以致克己求仁之功而深斥其所學之誤以爲舍六經語孟而尊史遷舍窮理盡性而談世變舍治心修身而喜事功爲學者心術之害極

爲呂祖儉潘景愈孫應時輩言之按朱子同時學術有江鹵之學湖南之學浙東之學江鹵之學陸文安登壇主盟與建安旗鼓相當莫可稍下雖兩家門人弟子往來講論如晉楚之從交相見卒未有能拔趙幟而立漢幟者也湖南之學發源於五峯導流於南軒如性無善惡知覺爲仁及先務察識諸說朱子爲之疏滌排決南軒皆降心以相從而胡廣仲吳晦叔諸君子有切磋之功而無齟齬之誚真所謂末乃同歸而一致者也惟浙東或談心性或矜事功高者入虛無卑者湛利欲觀文集語類所論浙中學術別而出之約有四家不

僅子約叔昌諸公已也今攷其可見者著於篇

永康陳同甫之學

陳亮字同甫婺州永康人屢詣闕上書光宗御極擢進士第一人授簽書建康府判官廳公事未至官卒諡文毅今傳者有龍川集

本傳爲人才氣超邁喜談兵議論風生下筆數千言立就嘗曰研窮義理之精微辨析古今之同異原心於杪忽校禮於分寸以積累爲功以涵養爲主晬面盎背則於諸儒誠有媿焉至於堂堂之陣正正之旗風雨雲雷交發而并至龍蛇虎豹變現而

出沒推倒一世之智勇。開拓萬古之心胸。自謂差有一日之長。  
亮意蓋指朱某呂祖謙等云。

朱子荅書云。老兄平時自處於法度之外。不樂聞儒生禮法之  
論。私竊疑之。願絀去義利雙行主霸並用之說。粹然以醇儒之  
道自律。則所以爲異日發揮事業之地者。亦光大而高明矣。  
語類云。同父才高氣麤。又曰。同父在利欲膠漆盆中。

所按陳同父爲呂成公所重。朱子提舉浙東時。同父來謁。其  
後書問不絕。朱子雖力辨其義利雙行主霸並用及漢唐行  
事非三綱五常之正。而同父終不能從。是爲永康之學。

東陽呂子約潘叔昌之學

呂祖儉字子約婺州人東萊先生之弟也官至大府丞以論事得罪韓侂冑死貶所宋史忠義有傳所著有大愚集今佚

朱子荅書云所謂秦漢把持天下有不由智力者乃是明招堂上陳同甫所說不謂子約亦作此見而爲此論也

又書云若如此說則是學問之道不在於已而在於書不在於經而在於史爲子思孟子則孤陋陝劣而不足觀必爲司馬子長班固之儔然後可以造平高明正大之域也

又書云同甫後來又兩得書已盡底裏荅之來書亦於智力二



字畢竟看不破放不下

又書云枉尺直尋素未嘗以此奉疑但見頃來議論如山移河決使學者皆有趨時徇勢馳騫功名之心令人憂懼

荅沈叔晦書云子約爲人固無可疑但其門庭近日少有變異而流傳已遠爲學者心術之害

荅劉子澄書云婺州自伯恭歿後百怪都出至如子約別說出一般差異底話全然不是孔孟規模

所按子約爲成公之弟成公與朱子共肩斯道講論親切子約不應差異至此其所以差異者蓋動於永康之議論耳永

康縱橫馳驟不可一世成公在日便往來於明招講席之間  
及成公既沒子約爲其所動自以爲有用之學而不知陷入  
計功謀利之窠臼而不能拔出朱子屢致書規之然子約素  
切磋於朱子省身克己用力甚深見答子約書是以終能奮發大  
節凜然不可與縱橫駢馳之士一側而視之也

潘景愈字叔昌婺州人居近呂成公與兄景憲俱以學名

朱子答書云示喻讀史曲折鄙意以爲看此等文字但欲通知  
古今之變又以觀其所處義理之得失耳初不必翫味究索以  
求變化氣質之功也

又書云六國表議論乃是衰世一種卑陋之說吾輩平日講論聖賢何爲卻取此等議論以爲標準殊不可曉向荅子約一書亦極言之正恐赤幟已立未必以爲然耳

又書云示喻漢唐故事以兩家較優劣則然然以三代之天吏言之則其本領恐不但如此吾輩正當以聖賢爲師取其是而監其非不當以彼爲準則也

荅黃直卿書云婺州一種議論名宗呂氏而實主同甫潘家館客往往皆此類

荅程正思書云浙學尤更醜陋如潘叔昌呂子約之徒皆已深

陷其中。

所按叔昌所學其詳不可攷以朱子荅書觀之大氏與子約相近是爲成公殤後東陽別派之學

又按年譜浙學中又有孫應時孫字季和大全集中有荅書二首別集中有荅書八首細核之似非子約叔昌之比且別集第三書云大氏學者專務持守者見理多不明專務講學者又無地以爲之本能如賢者兼集眾善不倚於一偏者亦寡矣然則季和之學實見許於朱子故今不削

永嘉陳君舉葉正則之學

陳傅良字君舉温州瑞安人登進士甲科官至寶謨閣待制今傳者有春秋後傳止齋文集

本傳永嘉鄭伯熊薛季宣以學行聞而伯熊於古人經制治法討論尤精傅良皆師事之而得季宣之學爲多

呂東萊與君舉書云自昔所見少差流弊無窮者皆高明之士

也朱子與葉正則書云年來見得此事極分明乃知曾子竟以魯得之而聰明辨博如子貢者終不得與聞真有以也與東萊答君舉

之意同又曰公私之辨尤須詳察

陸象山與君舉書云世習靡敝固無可言以學自命者又復錮蔽私見卻鍼拒砭厚自黨與假先訓刳形似以自埒益不知其

實肯馳久矣。

朱子荅劉公度書云。君舉書殊不可曉。似都不曾見得實理。只是要得博襍。又不肯分明如此說破。欲包羅和會眾說。不令相傷。其實都不曉得眾說之是非得失。自有合不得處也。葉正則亦是如是。

語類云。君舉有周禮類數篇。又說漢唐好處。與三代暗合。

葉適字正則。温州永嘉人。純熙五年進士第二人。官至寶文閣學士。諡忠定。今傳者有水心集。本傳志意慷慨。雅以經濟自負。

朱子荅書云來書豪毛鈞石之喻是乃孟子所謂尋尺者此等議論近世蓋多有之不謂明者亦出此也

又書云見士子傳誦所著書及荅問書尺類皆籠罩包藏之語中間得君舉書亦深以講究辨切爲不然無他只是自家不曾見得親切故作此見耳

黃氏震曰水心力排莊老正矣乃并譏程伊川則異論也力主張恢復正矣乃反斥張魏公則大言也能力詆本朝兵財靡敝天下以至於弱正矣乃欲割兩淮江南荆湖存諸人以免養兵獨以兩浙爲守又欲抑三等戶代兵茲又靡敝削弱之尤者也

所按止齊水心兩公爲經制之學。雖其公私義利。包羅籠罩。不甚分別。大旨與永康相出入。而其持躬端正考事詳密。立論整實。終與永康不類。是爲永嘉之學。

四明楊敬仲袁潔齋舒元賓沈叔晦之學。

楊簡字敬仲。慈溪人。乾道五年舉進士。授富陽主簿。官至寶文閣學士。今傳者有楊氏易傳。慈湖詩傳。慈湖遺書。

慈湖遺書云。簡行年二十有八。居太學。夜返觀。忽覺天地內外。森羅萬象。幽明變化。有無彼此。通爲一體。後因承象山先生扇訟是非之答。而又覺澄然清明。



又云道心發光如太陽洞照

陳氏建曰朱子嘗謂浙江有般學問是得江西之緒餘只管教人合眼端坐只覺一箇物事與日頭相似便謂之悟正是指此朱子答潘子善書云楊敬仲其人簡淡誠慤自可愛敬而其議論見識自是一般又自信已篤不可復與辨論亦不必徒爲曉曉也

袁燮字和叔鄞縣人登進士第官至知溫州進直學士諡正獻今傳者有絜齋家塾書鈔絜齋毛詩經筵講義絜齋集

本傳燮初入太學陸九齡爲學錄同里沈煥楊簡舒璘皆在學

以道義相切磨。後見九齡之弟九淵。發明本心之旨。乃師事焉。  
舒璘。字元質。一字元賓。奉化人。登乾道八年進士。官至通判。宜  
州。諡文靖。今傳者有文靖集。

本傳從陸九淵遊。曰。吾惟朝于斯。夕于斯。刻苦磨厲。改過遷善。  
日有新功。亦可以弗畔矣乎。

沈煥。字叔晦。定海人。登乾道五年進士。官至通判。舒州。追贈直  
華文閣。諡端憲。

本傳。試入太學。與臨川陸九齡爲友。從而學焉。

朱子荅書曰。目前務爲學而不觀書。此固一偏之弊。

又書曰近年學者求道太迫太論太高往往嗜簡易而憚精詳樂渾全而畏剖析以此不本天理之本然

宋史陸九淵傳門人楊簡袁燾舒璘沈煥能傳其學云

所按楊袁舒沈四先生雖所造各不同而皆傳金谿之宗旨朱子謂浙中朋友一等底只理會上面道理又只理會一個空底物事都無用蓋指此也是爲四明之學

朱子借陸學以鍼砭婺學說

婺州自呂成公歿後大愚叔昌諸君震於永康之議論輕心性重事功其弊將枉尺而直尋且不免利欲之膠漆始朱子與成

公切磋之時共肩斯道不意一傳而弊至斯極也純熙辛丑季冬朱子除提舉浙江常平公事壬寅哭成公於明招之墓會同甫於衢婺之間與浙人往來講論者一載癸未甲辰奉祠家居始辨浙學之謬而於婺州尤三致意焉蓋大愚乃成公之弟而叔昌亦及門之佳士也初陸文安公講學臨川呂成公爲之介紹始與朱子爲鵝湖之會文安之學在於收拾精神自作主宰與朱呂先知後行由博反約之論不合然與其癖傳耽史心日外馳何如收斂凝定尙能不失其本心也計功逐名利日益熾何如恬澹廉靜尙能不失其素志也知智力之說不如德性而

後一切把持之念消。知涵養之功可勝浮躁。而後一切犇放之意絕。於是恒借陸學以鍼砭之。荅劉子澄書云。子靜一味是禪。卻無許多功利術數。目下收斂得學者身心。不爲無益。荅陳膚仲書云。陸學固有似禪處。然婺州朋友專事聞見。而於身心全無功夫。所以每勸學者兼取其長。荅吳伯豐書云。學不過兩種。一則脫略太高。一則專務外馳。其過高者固爲有害。然猶爲近本。其外馳者詭譎狼狽。更不可言。荅沈叔晦書云。務爲學而不觀書。此固一偏之論。然近日又有一般學術。廢經而治史。略王事而尊霸術。如此讀書。則又不若不讀之爲愈也。凡文集中如

此類者甚多，皆不得已而爲補偏救弊之計。其詞氣抑揚宛轉之間，亦無難明其意之所在。昧者不察，遂以爲朱子晚年之學，實尊信文安，不亦誣乎？

及門婺源汪經化榜書

述朱質疑卷之十

當塗夏忻心伯甫學

與某論朱子傳注書

足下博聞強識而染於近世淺淺之習好議先儒之非竊以爲  
讀書之法當明大體子貢曰賢者識其大者中庸曰及其至也  
雖聖人亦有所不知焉曾子曰君子所貴乎道者三動容貌斯  
遠暴慢矣正顏色斯近信矣出辭氣斯遠鄙倍矣籩豆之事則  
有司存孟子曰知者無不知也當務之爲急自古聖賢爲學之  
規模如此孔子大聖也成春秋維王迹誅亂臣賊子孟子以抑



以水驅猛獸與之比烈者此也。至於襄公二十一年九十兩月二十四年七八兩月連書日食攷之推步斷無比月而食之理。此係魯史之誤無疑。夫子存之而不改者以非春秋大誼所在故耳。孟子亞聖也。道性善闢楊墨黜霸功以崇王道使孔子之道得明於後世。韓昌黎稱爲功不在禹下者此也。至於淮泗入江與禹貢不合冠禮父命與儀禮不合此係著述時引用偶未詳究亦以非全書大誼所在故耳。朱子生濂洛之後力肩道統出學庸於戴記配論語孟子而爲四書又爲章句集注以闡其蘊。元明及今家絃戶誦人人得聞孔孟之傳黃勉齋稱爲集諸

儒之大成者此也。至於制度名物沿舊說之悞者亦有之矣。後人往往毛舉一二細誤肆意排詆。果爾則連書日食遂可以不  
知推步爲孔子病乎。淮泗入江遂可以不讀禹貢爲孟子病乎。  
是以學者讀書當明大體。

與詹小澗茂才論朱子晚年全論書

臨川李穆堂先生爲金谿之學。晚年全論一書。聞之久矣。昨於  
鄴架見之。卽攜置行篋中。途間讀過半。歸來全閱一通。此書不  
過爲學部通辨報仇。無他意也。朱陸之學。晚年冰炭之甚。此通  
辨之說。雖百喙亦莫能翻案。乃此書爲之說曰。朱子晚年論陸

子之學如冰炭之不相入。而朱子晚年與陸子之學則符節之相合。夫學則全同而論則全背。是陰篡其實。陽避其名。此乃反覆變詐之小人。鄉黨自好者不爲。而謂朱子爲之乎。所引朱子之書凡三百五十餘條。但見書中有一心字。有一涵養字。有一靜坐收斂等字。便謂之同於陸氏。不顧上下之文理。前後之語氣。自來說書者所未有也。朱子誨人。各因其材。懲心性之虛無。則每進以管實。救口耳之泛濫。則恒示以精微。乃見朱子書中有箴學者溺於記誦語。則曰。此朱子晚年悔支離之說。此朱子晚年答章句訓詁之說。不復顧其所答何人。所藥何病。孰是以

論則爲之猶賢乎已。孔子真有取於博奕矣。朱子一生之學。日進無疆。晚年造詣。後學何敢妄擬。然朱子之心。則未嘗一日自足。望道未見之語。時流露於簡牘之間。乃見朱子自謙之言。則

曰朱子五十七歲猶云自誤誤人。

荅劉子澄書

六十七歲後始云晚

方自信。

荅周南仲書

七十歲後始云至老而後有聞。

荅余景思

若與同時

頓悟之學。去若天淵。此鳳凰已翔乎九仞。而蟪蛄猶窺於蠡睫也。悲夫。朱子之書宏博浩瀚。皆學者所當誦習。而尤精者在四書章句集注。時時改定。至老不倦。易簣前猶改誠意章。可謂豪髮無餘憾矣。乃謂朱子之四書。晚年尙無定見。亦無定本。又謂

朱子補格致傳背卻經文橫生枝節又謂朱子明知章句之解不可用而又難於自改又謂朱子勝心爲害自欺欺人其信然乎其否乎足下生朱子之鄉爲朱子之學居敬窮理躬行實踐不宜一刻放過慎勿爲異說之所惑則幸矣

朱子自道所學恒欲然不足說

自古生知安行之聖至文王孔子止矣然而文王孔子之心不自以爲聖也孟子稱文王望道而未之見孔子於尋常至易之事學者之所共能而一則曰某未能一一則曰何有於我自後世學者觀之以爲聖人之謙詞而不知當日皆出於中心之誠

流露於自然而不自覺耳。朱子資稟之異。亞生知安行一等。而其望道未見之心。則與文王孔子無以異也。觀於文集所載與人論學諸書。挾經之心。承聖之統。析理之密。衛道之嚴。皆具有邁往無前之概。而其抑然不敢自是。常若歉然之語。又時時自其胸次流出。不惟一再言之。且言之不已。至於不可勝數。蓋文王孔子之心法。固如是也。論者不察。見荅何叔京書。有自誑誑人之罪。不可勝贖之語。遂以爲朱子晚歲痛悔拯艾。大悟舊說之非。及後人考訂年月。尙在四十以前。又有取朱子五十後諸書。如荅呂子約有儘有向來見不到語。荅江德功有區區前日

之病。今始自悔語。荅潘叔度有覺得目前外面走作不少語。荅劉子澄有日前看大學不切。亂道誤人語。又有向來浮泛之弊。不惟自誤。而誤人亦不少語。荅余景思有老而後有聞語。遂以爲朱子之學。晚猶未得聞道。及既老而僅得有聞。較之同時頓悟之學。相去不啻天淵。嗚呼。執是以論。則文王之望道未見。真未之見。而孔子之何有於我。亦真未之有矣。烏知古聖賢日進無疆。欲然不足之心法哉。

朱子因人論學言各有當說

師弟荅問。莫詳於論語一書。同一問仁。而所荅之仁不同。同一

問政而所荅之政不同。同一問孝。問君子而所荅之孝與君子不同。夫子明著其說於冉有季路曰。由也兼人。故退之。求也退。故進之。聖人設教之苦心。此其例也。朱子生伊洛之後。溯洙泗之統。平生爲學。主敬以立其本。窮理以致其知。反躬以踐其實。闡發義理。而不流於訓詁。精研性命。而不入於虛無。精粹之說。盡於章句集注。斟酌美善。無復罅漏。是乃朱子之全論也。至於朋友師弟問荅諸書。或言涵養。或言主一。或言持守。或言提撕。警覺。或言博覽之非。或言記問之醜。皆不過補偏救弊。因人設教而已。後世論朱子之學者。拾其單篇碎句。隻義孤詞。輒指而



目之曰。是與易簡工夫之說合。是與識其本心之論同。是卽所謂先立乎大。切戒支離也。是卽所謂裏面用功。專務踐履也。影響附會。儻侗不分。以是爲朱子之全論。適足形一己之偏私。與朱子果何損乎。

與友人論箒燈約旨書

昨承問光山胡氏精於周易。其箒燈約旨中。頗不滿意於程朱其說是否。竊以爲孔孟之書。得周程張子而明。得朱子而益大明。朱子詮說孔孟之經。體用一原。隱顯無間。後雖有如朱子之人出。亦不過研之極其精行之極其至。足以配朱子而繼往聖。

斷不能有增於朱子之外。或加於朱子之上也。至挾好勝之心。必欲別生異解。非得此則遺彼。非語東則窒西。一格以朱子之說。皆適形其淺陋耳。如約旨以朱子中庸注道猶路也。爲不然。其言曰。率者順也。不作行字解。順自內循循而出。又引西山真先生曰。子思之所謂性者。循其天命之性也。循字最妙。乃率字正解。行則外面之動象也。道字解曰。猶

路。是將率字認作行字了。率者順也。譬若從京都而至某省。非從他省而至某省也。又如從京都而至某省。非但從京都而至某府某州也。今日猶路。試觀後面君子之道費而隱。又觀語大莫載。語小莫破。又觀造端夫婦。此豈路字所能解乎。四子之書。

諒無二道。亦可云。朝聞路。夕死可乎。所按道無正字。卽段借道。路之道爲之。孟子曰。夫道若大路然。若卽猶也。以猶路訓道。始於孟子。不始於朱子。卽如譬從京都至某省云云。是約旨卽以路字解道字。而不顧其自相矛盾乎。西山乃朱子之嫡傳。朱子曰。率循也。西山曰。循其本然之往。西山之循字最妙。章句之循字。何以不妙。說文。循。順行也。約旨之順字。卽章句之循字。順之必勝於循。未聞其審。訓道爲行。張元德之說。見朱子荅呂子約書。而朱子實未嘗以率字作行字解也。有體統之道。有模著之道。四書中何得無二道。如仁者人也。義者宜也。必處處改仁作

人改義作宜。便不可通。何獨至於以路訓道。必處處道字。改作路字乎。約旨又不然。朱子中庸性卽理也之注。其言曰。性卽理也。與孔子窮理盡性至命之說不合。理是有知有覺之後。方始見得。豈性之體耶。孔子之繫易也。曰窮理盡性。以至於命。旣將理性分說。則理非性可知。理字之上。用一窮字。豈不全在知識上面用功。性是定命之靈源。含生之主宰。理在逐事逐物。條理分明。細微曲節上見。旣有條理可言。已在有知有覺之後矣。旣按程子性卽理也之說。朱子以爲顛撲不破。理極見於萬殊。一物各有一理。所謂物物各具一太極也。理統會於一原。萬物共

此一理所謂萬物體統一太極也。理本條理之謂。程子曰。在物爲理。致知格物。卽窮理之謂。豈得謂約旨所說盡非。但有知有識以後。心所能窮之理。卽受形稟命之初。天所全賦之理。使人心受之於天。先無此理。何以有知有識以後。便能窮此理乎。天之體渾然一太極。包含元亨利貞人之心。亦渾然一太極。包含仁義禮智。性者。仁義禮智是也。理者。亦卽仁義禮智是也。在物之理。千條萬緒。皆根仁義禮智而來。所謂萬物各具一太極也。有知有識以後。所能窮者。窮此而已。在天之理。萬派一原。無非仁義禮智之性。所謂萬物體統一太極也。受形稟命之初。所全

昇者昇此而已。以是而議程朱性卽理也之訓。毋亦逐其末而  
忘其本乎。約旨又以論語此所謂性兼氣質而言之注爲不然。  
其言曰。宋儒言性必欲兼言氣字。誤盡天下後世。致令天下後  
世怠廢自棄者。托於氣質以自諉謝。豈聖人教人本意。氣質之  
性。謂性中有惡。與荀楊湍水同見。周子曰。幾善惡。孔子曰。幾者。  
動之微。吉之先見者也。言吉而不言凶。是卽性善之旨。漢儒不  
知此旨。吉字下添出凶字。以致後儒并將善惡二字解說。幾字。  
遊其門者。據誠無爲。幾善惡之說。又分說義理之性。氣質之性。  
傳授不確。詒誤後世不少。恐聖人之本文。不可一言增損也。所

按程張氣質之說爲自古來儒者所未道朱子謂自孔子曾子

子思孟子理會得後都無人說這道理

語類云孟子終是未備所以不能杜絕荀楊之

口是記錄者之誤也

朱子豈不知孔孟曾思未明說氣質之性乎然孔子

以繼善言性而又有近遠不移生安學利困勉之論則不言氣

質而氣質可推孟子道性善而又有形色天性味色聲臭性也

之說則不言氣質而氣質又可推曾子之明德子思之天命皆

性善之說也知愚不肖強柔之各不能一格致誠正修身之自

明而誠皆氣質之說也自程張有氣質之辨而後儒因致其變

化氣質之學有功後世莫此爲大謂之詒誤不亦誣乎周子之

幾善惡乃言感物而動之際非天命以性之初卽以孔子之言

證孔子吉凶悔吝生乎動何嘗言吉不言凶顏子之有不善未

嘗不知知之未嘗復行不達而復卽上節知幾之義

項氏安世曰此章內

十一爻雖各爲一段而意皆相貫此爻尤與上爻文意相貫漢書之有凶字未可以爲漢儒

之言而訾之也其他天道歸仁諸說皆與程朱柄鑿不相入總

之光山胡氏之學沿金谿姚江之傳故以主敬不如主靜之善

一貫卽是孔門頓悟之學無極太極之辨朱不如陸姚江良知

之說知之者鮮其流弊至於滅棄師承

約旨云學必師承皆好名者附驥之見耳

崇信輪廻

約旨云天下之大忠大孝有一世再世求了心願者矣天下之大好大仇有一生再生期爲報復者矣



皆未免於高明之過矣。

與定海王薇香明經論論語後案書

恭讀大箸論語後案兩冊。雖未窺全豹。已得聞纂述之大旨矣。書中云。余平生服膺宋諸儒之說。令弟敘云。余四兄於程朱所著之書。徧讀而徐悟之。則今日能爲程朱之學者。舍先生其誰與。夫程朱之釋經。雖不敢謂其字字句句。盡得聖人之意。然其大者固得之矣。大莫大於性道諸說。於性道諸說而不得。何以爲程朱。金谿姚江之敝。今時已息。而孟子字義疏證。又復恣其詆毀。不謂精博如先生。而亦偶有取於其說也。又程朱雖未能

便是聖人。然皆顏曾之侶。王佐之才。使其得位行政。皆可以制禮作樂。復三代之盛。古之一名一物。無關重輕者。朱子多因仍舊說。至於郊禘大禮。非聖人不能作。非亞於聖人者。不能心知其意。程子謂魯之郊禘。成王之賜。伯禽之受。皆非也。義蘊宏深。於此等言而可駁。則亂臣賊子。接迹天壤矣。周公身爲王臣。與孔子異代師表。何得比而同之。朱子取趙伯循之說。以言禘而禘說大定。在伯循不過一得之智。而大賢聲入心通。沛然莫之能禦。所謂集諸儒之大成也。遍檢諸經之言禘者。玩其本文。及上下文義。何嘗有一語及天祭法禘在郊上。自魯及稷立文順。

而下之。他經則皆郊在禘上。何得因國語禘郊連文。遂以爲祭天之證。國語本後人之書。非左傳可比。卽禘郊不過爾栗。亦與爾雅旣伯旣禱馬祭也。徒御不驚輦者也。同一文法。經典中如此類之省文甚多。實孤證不足爲據。如必復感生五天帝之說。則後世必有瀆亂典禮而流爲不經者。不可不防其漸也。又注經當謹嚴。而論語爲聖人之遺言。尤當謹嚴。千乘雖二說。而八百家出一乘。非三百一十六里有畸。不能容。毋論左傳孟子王制。無出百里之國。卽以論語證論語。如由言千乘。求卽言方六十。如五六十。又夫子千乘之國。與百乘之家對言。皆其的據。

則周禮之說闕疑可也。以上皆準準大者有所不安於心不敢爲埒和肅同之見。所竊謂論語一書包羅天地囊括古今見仁見知原不妨各抒心得。但其宏綱大義不可有違。庶幾能繼往聖之心聞先賢之蘊而示後學之正軌也。相去千餘里不能北面請益謹獻其疑於左右惟先生察之。

與友人論論語論仁論書

憶昔此書纔墨諸板。凌仲子先生自浙來攜以見示。彼時卽不安於心。後數年曾作一書論之。語嫌戇直未敢出以示人。請爲足下言其大略焉。仁字萌芽商書。周禮列於六德皆不過慈祥

愷悌之謂。吾夫子作文言。以體仁配乾元。尊爲四德之首。孔門之教。遂以仁爲學問大主。堯程子所謂偏言則一事。專言則包四德是也。朱子以愛之理。心之德。釋仁字。愛情也。理性也。有仁之性。斯發爲愛之情。孟子所謂惻隱之心。仁之端也。義禮智信。皆心之德。獨於仁言之者。所謂專言則包四德也。天地之心。無一息之不仁。故生物之機。隆冬未嘗或斷。人得天地生物之心。以爲心。亦無一息之不仁。特爲私欲所蔽。則有時而斷。然惻隱之端。隨處流露。故曰我欲仁。斯仁至矣。孟子曰。仁人心也。孔子曰。回也。其心三月不違仁。程子曰。滿腔子是惻隱之心。古聖賢

言仁無不屬於心者。乃此書忽有取於康成中庸注相人偶一  
言。謂必有二人而仁始見。從無一人獨爲仁之事。曾子制言篇  
所謂人非人不濟。馬非馬不走。水非水不流。數語足以發明。制言  
篇數語皆言人之相與與仁字全無交涉。凡論語五十八章論仁之旨。推之以及諸  
經。無不召合。而程朱之言仁一字不取。以爲但取其是者而非  
者自見。何其立論之果也。鄭氏中庸注云人也。讀如相人偶之  
人。以人意相存問之言。相人偶者。漢時恒言。不知所自來。鄭氏  
往往以之注經。聘禮公食禮相人偶者。卽與人爲偶也。漢時未  
有反切。注經家有讀如讀爲之例。讀如者。讀此字如彼字之音。

不取其義

先鄭之注多如此如欲其舉爾讀如紛如舉參之舉欲其模屬讀如子南僕之僕

亦有兼詁

義者

後鄭之注詁音中每兼詁義

然但取句中一字之義非以讀如之全句

爲訓

如太史是右讀如周公右王之右止取右字之義不全取周公右王四字醕有與也讀如諸侯以禮相與之與止取

與字之義不全取諸侯以禮相與六字

此讀人也如相人偶之人是詁音而亦兼

詁義者言讀此人也之人與相人偶之人同音同義並非以相

人偶三字解人字何況仁字乎下云以人意相存問之言始正

解仁者人也之義凡與人偶則生親愛存問者卽小行人存頻

聘省問之存問謂以人之意存察而勞問之所謂親愛之也與

人親愛必自親親始故曰親親爲大人意相存問亦漢人之恒

語故曰以人意相存問之言。鄭注之意。不過如此。何嘗以相人偶解仁字。并解諸經之仁乎。又表記仁者人也。鄭注云人也。謂施以人恩也。卽中庸注以人意相存問之意。謂以人恩待人之意。相施給之也。是鄭氏實未嘗以相人偶訓仁也。茲姑不具論。果如此書之說。必有二人而仁乃見。則顏子三月不違仁。是顏子之心。三月不違於相人偶矣。君子無終食之間違仁。是無終食之間不相人偶也。造次顛沛必於是。是造次顛沛必相人偶矣。求仁而得仁。是求相人偶而卽得之。殺身以成仁。是殺身以成人偶也。其可通乎。其不可通乎。嗟乎。仁爲天下之至理。爲仁



乃聖門之首務。觀朱子仁說及荅張敬夫何叔京游誠之諸書。以心有知覺釋仁之名。以萬物與我爲一爲仁之體。以惺惺爲仁之意。皆力爲辨明。不使稍涉疑似。不意六七百載而後。又有援引康成之注。如論語論仁論之所云也。

與友人論孟子字義疏證書

足下盛稱孟子字義疏證一書。爲近今之鉅製。竊以爲過矣。此書位置甚高。自以爲孟子而後。至我

朝乾隆年間。近二千載。無一人能明孔子之道。宋程子朱子皆不免冒宗亂族貽禍無窮。特作疏證一書。由孟子以通孔子之

道不使程朱害事害政之言復行於世其所以不能已於辨者與孟子之闢楊墨韓子之闢佛老同爲不得已之苦心其信然乎其否乎所非知道者何足以知疏證中之道請粗陳鄙見之一二以俟賢者擇焉疏證謂理者條理分理之謂孔孟六經以及傳記羣籍理字不多見

凡字義至後世益加密於前如詩書中仁字皆親愛之義至孔門始以仁包四德孟子又添說義字詩書中聖字皆明通之謂至孔孟始以聖爲絕德他如大學之格物中庸之未發已發孟子養性然之氣皆前聖所未道宋儒之理氣體用諸說亦然但當論理之實諸往聖者或合或否不當論字之見於載籍者或多或寡

今人一啓口而卽曰理自宋以來始相習成俗宋人言理如有物焉得於天而具於心因以心之意見當之理在事物處事物

而當合於人心之同然始謂之理。非得於天而具於心也。天理  
即存乎人欲之中。非以天理爲正。人欲爲邪也。程朱就老莊釋  
氏所謂真宰真空者。轉之以言理。而六經孔孟之道亡云云。所  
按理也者。萬事萬物當然之則。疏證以自然者爲欲必然者爲  
理而不肯言當然。夫欲任自然  
則無所不至矣。理曰必然。則鮮不以意見孔子所謂有物必有  
當之者。惟求其當然。則知之明而處之當。  
則是也。程子亦云在物爲理。然是理也。雖庸夫孺子皆知之。所  
人一啓口  
即曰理。如天下即有不孝之子。未有敢說子之不當孝者。天  
下即有不忠之臣。未有敢說臣之不當忠者。故詩曰天生蒸民。  
有物有則。孟子曰我心之所同然者。謂理也。義也。豈非得於天

而具於心乎。惟昇於天而具於心。是以庸夫孺子皆可以知其知也。無幽深元遠之妙。故曰易知。又庸夫孺子皆可以能。其能也。無委曲煩重之迹。故曰簡能。易簡而天下之理得。此之謂也。易知乾也。簡能坤也。非得之於天乎。吾心苟無是理。何由易知而簡能。又何以處事而當。合於人心之所同然。孟子曰。君子所性。仁義禮智根於心。則具之於心亦明矣。理之在事物者。徹著之理也。理之在一心者。體統之理也。必以理屬事物而不屬之心。是告子外義之學也。天理者在天爲元亨利貞。賦於人則爲仁義禮智。疏證謂天理爲自然之理。取莊子依乎天理爲說。誤程朱則謂與老莊爲一。言天理又不肯與莊子爲二。

人欲者。在人爲耳。目口鼻接乎物。則爲聲色臭味。欲縱有不必

盡邪者。未有理而不正者也。老釋之真宰真空。指虛無寂滅而

言。程朱所謂理。指真實无妄而言。朱子曰。釋只說空。老只說無。卻不知真實於理。判若

天淵。而謂轉彼以言此。是文致之法也。如有物焉。乃老莊之說。

老曰。其中有物。釋云。有物。先天地。程朱無是言。加於得天具心之上。張冠李戴。不亦誣

乎。理字萌芽於繫辭。孟子而實天下之恒言。民間之傳語。程子

性卽理之訓。卽藉民間之恒語以解之一啓口。而卽曰理。豈始

自程朱乎。以意見爲理。程朱之所深惡。故格物之訓。致知之補

傳。觀縷言之。而謂程朱卽其人。真辜負先賢之苦心矣。至於條

理分理之謂理朱子詳言之

見語類

不過與疏證所云名雖同而

實則異耳疏證謂性者人與物之血氣心知萬類不齊之總名

羽飛毛走蟲螫土魚游水之類此血氣之萬有不齊難知晨牛知耕燕知戾已蚯蚓知雨之類此心知之萬有不齊性善

者人之血氣心知能進於善之謂耳能辨聲目能辨色理義可

以謂之性性不可謂之理目悅色故色可謂之性性不可謂之

之聲口鼻亦然心悅理義故理耳悅聲故聲可謂之性性不可謂之理義存乎事情不存乎人之心

義可謂之性性不可謂之理色聲臭味在物而接於我之耳目口鼻非色聲臭味具於我之

耳目口鼻也理義在事而接於我之心非理義具於我之心也

不過人之心能通之耳天命之謂性謂氣質之不齊各限於

生初疏證命字義作限字解

即後儒所謂氣質之性也自程朱創立氣質

之性名目。而以理當孟子所謂善。則自聖人而下。皆不美之質。孟子言人無有不善者。程子朱子言人無有不惡。其旨與荀子性惡之說合云云。灼按程子性卽理也之說。發揮孔孟性善之旨。顛撲不破。不知疏證何獨惡此理字。以爲性不可以理言也。後人之理字。卽仁義禮智之謂也。賦於人爲仁義禮智。本於天爲元亨利貞。中庸天命之謂性。卽孔子元者善之長。亨者嘉之會。利者義之和。貞者事之幹也。雖一言性。卽有氣。然此句終屬於理。孟子之以四端言性。實淵原於此。其云性善。卽繼善成性。各正性命之謂也。程朱之以理詮性善。與孔孟召合無間。豈僅

人之血氣心知能進於善之謂乎。至於性從心從生。既生之於心。卽不離乎氣質。所以昏明強弱紛紛不齊。告子及荀楊韓諸儒不得其說。是以各爲之解。自程張論性不論氣不備之說出。而後撥雲霧而見青天。張子氣質之性。君子有弗性焉者。卽孟子性也有命焉。君子不謂之性也。疏證獨取先儒之不以爲性者。而必輾轉以申其說。不知已落佛氏之窠臼。達磨答西竺國王作用之說曰。在目前視在耳能聞在手能捉在足運奔在鼻臭澁在口談論徧現俱該沙界收拾在一微塵。識者知是道性不識喚作精魂而反以程朱與荀卿合。不亦誣乎。疏證深以周子無欲之說。程朱理欲之辨爲不然。以爲飲食男女人之大欲存焉。聖人泊天



下體民之情達民之欲而王道備。老莊貴無欲。宋儒祖之以爲說。舉凡民之饑寒愁怨飲食男女常情隱曲之感。咸視爲人欲之輕者。一切忍而不顧。其爲禍不可勝言。云云。所按欲有根於秉彝者。如欲仁欲立欲達之類是也。欲有出於形體者。如目之欲色耳之欲聲四肢之欲安佚是也。欲有流於偏私者。如其欲逐逐克伐怨欲之類是也。無欲故靜。孔安國注論語已用之。想亦古之遺言。豈必老莊之所云乎。程朱理欲之辨。安得與體民之情達民之欲並論。若必以欲爲養欲給求之欲。則槩也慾苟子之不欲諸語俱不可解矣。程朱所著之書發揮王道。纖悉具

備無非達民之欲。體民之情。朱子外任九載。漳州之經畝。浙東之荒政。何一非體情達欲善政。而謂自宋儒辨理欲。遂爲鍋於天下。此似非仁人之所忍言也。總之疏證一書。專與程朱爲仇。知名物制度。不足以難程朱也。遂進而難以性命知道德崇隆。不能以毀程朱也。遂進而毀其學術。程朱之學術。莫大於辨理。辨欲。辨氣質之當變化。一切皆不便於已。於是掃而空之。以理責我者。以爲是。乃程朱意見之理也。以欲責我者。以爲欲。乃人生之所不可無。聖人無無欲之說也。以變化氣質繩我者。以爲氣質。卽天命之性。主敬存理。皆宋儒之認本來面目也。當時高

明之士如靈臯方氏惜抱姚氏未嘗不深惜其蔽今七八十年間如江都焦氏之作孟子正義定海王氏之作論語後案已漸用其說矣吾子又復尊而信之所不勝杞人之憂所爲吾道干城幸甚

錄蒿庵閒話三則示諸生

蒿庵張先生諱爾歧字稷若蒿庵其號也山東濟陽人東吳顧亭林稱爲獸精三禮卓然經師閒話二卷刻貸園叢書中多格言至論深惡學者詆毀紫陽言之真切茲錄三條於左  
明初學者宗尙程朱文章實實名儒碩輔往往輩出國治民風

號爲近古。自良知之說起。人於程朱始敢爲異論。或以異教之言。詮解六經。於是議論日新。文章日麗。浸淫至天啓崇禎之間。鄉塾有讀集注者。傳以爲笑。大全性理諸書。束之高閣。或至不蓄其本。庚辰以後。文章猥雜最甚。能綴砌古字經語。猶爲上駟。俚詞諺語。頌聖祝壽。喧囂滿紙。聖賢微言。幾掃地盡。而甲申之變至矣。嗚呼。誰秉國成。非此讀書作文者耶。何以至此極也。追究其始。菲薄程朱之一念。實漸致之。何以故。師嚴然後道尊。舉世師紫陽者。近二百年。一旦以爲不足信。而弁髦之。其心固已侈矣。侈心漸肆。必且不信孔孟。人而不信孔孟。其心之所存可

知英。同上虐民敗人國事。何足異乎。嘗爲設一喻。童子之敢於忤師者。必其破乃翁家私者也。文章關乎世運。推言之。乃知其非廉。

學記曰。凡學之道。嚴師爲難。師嚴然後道尊。道尊然後民知敬學。後世既無碩師爲人所宗仰者。須推一古人爲之矜式。如有明之尊程朱是也。故其初年人材蔚興。風俗醇美。隆萬而後人敢肆爲異論。至於醜詆程朱。幾如三家邨老學究。且漸漸侮及先聖。於是名簡太裂。無禮無學。而天下遂大壞矣。

人有資性醇厚。立身謹愿。而好詆程朱者。於集注本義諸書。皆

極力吹索。妄生穿鑿。必別立一解。欲駕其上。若冒平心靜氣。於先儒成說。心體而躬踐之。豈不有益。乃費盡聰明。祇成一無忌憚。臯過亦深可惜。推原其故。自良知之說一倡。一二妄人。遂敢肆口訕笑儒先。其說流布四方。雖有美質。亦被引壞。百年以來。餘毒未殄。近日雖號爲遵註。其人大率意在制義揣摩。時趨而已。至於古人爲人苦心著書本旨。皆未暇體究。其中一種平淡真切之味。實未曾細咀而熟嘗之也。勿怪乎異說之紛紛也。以上三條。蒿庵先生爲畔程朱者。痛下鍼砭。可謂深切著明矣。所按周子云。師道立則善人多。程朱以前。孔墨孟荀竝稱

或少分別唐陸德明經典釋文有老莊而無孟子及至宋世  
非孟者猶有數家諸儒解釋經義或參以清談譏緯之說至  
程朱出直以孟子接孔子之傳朱子又出學庸於戴記配論  
語以孟子而謂之四書既爲章句集註又別作或問輯略精  
義諸書以明其情趣天地民物之理中和性命之說參贊位  
育之治無所不備而後天下有經師又程朱以前儒者遽相  
授受不過詁訓箋註之學躬行心得蓋闕如也自程朱出而  
曰居敬曰立誠曰窮理格物曰存養省察一言一動造次必  
於儒者其他辭受取與出處諸節確有規矩準繩不可踰越

巍然道德足以追配孔孟無慚而後天下有人師自明至今  
功令以程朱之說取士薄海內外罔不誦法而師事之實天  
理之至正人心之大公萬世之定論也今人總角後能入鄉  
塾卽讀小學讀論語孟子集注讀大學中庸章句始習訓詁  
繼通義理仁孝誠敬禮義廉恥之說飽飫於衷蓋年未及冠  
而立身制行之規模句中已有把握鉅儒名臣恒出其間卽  
婦人女子聞而感動者亦不少試問自宋以并無論五代卽  
漢魏晉唐之盛後生小子束髮讀書有得力如此之大而獲  
效如此之速者乎師資成我之功卽罔極生我之德也乃黠



者偶爾涉獵他說或沈溺虛無或矜夸淹博遂妄加詆毀肆  
無忌憚此周公所謂乃逸乃諺既誕否則侮厥父母曰昔之  
人無聞知也人心如此風俗安得不壞細繹蒿庵先生之言  
凡我同志尙其戒之

附錄蒿庵論太極圖一則

太極圖或以爲得之陳希奇或以爲得之僧宗元此皆信嚮二  
氏輕蔑吾儒之言吾儒亦每辨其誣不知此圖卽信得自二氏  
亦非二氏所得奄有也釋氏方以已性起滅世界豈肯先言太  
極陰陽而後言形生神發神仙家亦止言葆精鍊氣方欲絕棄

聖知。捷提仁義。烏有所謂定之。以中正仁義。主靜立極者哉。學者讀書。但當論其與孔孟合不合。不必問出自何人也。

所按周子太極圖。發天人之秘。窮造化之原。而其指示下手工夫。實實有可依據。非空言太極陰陽已也。二氏之徒。造爲傳授淵源。以爲得自彼教。韓文公原道篇中。所謂孔子吾師之弟子是也。吾儒不察。遂亦從而和之。又原道篇中。所謂吾師亦嘗師之是也。從來好異之士。遂加駁斥。而近世尤甚。高庵先生以爲卽信得自二氏。亦非二氏所得奄有。但當問其與孔孟合不合。不必問出自何人。真可以息羣喙矣。

及門婆源王 軒校字